



Cuira, ils 13 da december 2023

Communicaziun a las medias

Cussegl federal vinavant senza represchentant rumantsch

La Lia Rumantscha deplorescha ch'il Cussegl federal sa cumpona vinavant senza cusseglier federal rumantsch. Suenter *Felix Calonder* da Trin, ch'è stà en il Cussegl federal tranter il 1913 ed il 1920, avess la Svizra cun *Jon Pult* suenter passà 100 onns puspè gi in cusseglier federal rumantsch.

Jon Pult è pluriling ed avess cun ses origin engiadinais pudì represchentar en il Cussegl federal er anc la cuminanza linguistica rumantscha.

L'elecziun d'ina persunalitad rumantscha sco *Jon Pult* avess plinavant promovì en il Cussegl federal la visibilitad e l'irradiaziun dal rumantsch. Gist tar la Confederaziun, ch'è responsabla per la promoziun dal rumantsch en Svizra, domineschan las trais linguas tudestg, franzos e talian. In Cussegl federal cun commembras e commembers da tut las quatter cuminanzas linguisticas fiss stà in progress per la represchentativitad linguistica dal guvern da la Svizra. Ma era cun *Beat Jans* sco nov magistrat resta la spetga envers il Cussegl federal la medema, numnadamain ch'el saja conscient che las linguas èn ina part essenziala per la coesiun naziunala. La Lia Rumantscha gratulescha cordialmain a *Beat Jans* per l'elecziun sco nov cusseglier federal.